


Martica Arenda:

Savaneta su grupo di Carnaval ta haci come back cu Cactus Fantasy



ORANJESTAD(AAN): Martica Arends, ta un persona cu a traha 24 aña cu e grupo di carnaval di Savaneta. El a retira solamente door cu el a confronta algun problema di salud y no por sigui atende cu e grupo mas.

Esaki tabata diestres aña. El a worde sorprende na momento cu el a worde acerca door di e grupo Excellence

y Bibi Arends, kendenan a haci un apelación riba dje pa participa den carnaval. Como cu ta celebrando e di 60 aña di Aruba su carnaval, ta existi e deseo pa logra participación di e gruponan di antes. Algo den estilo di un "comeback" di e grandinan di antes.

El a menciona cu e gruponan cu a worde acerca tabata esun di Savaneta, Esso Club,

Caribe, Tivoli y Sidonia. "Mi a haya e idea masha bunita. Nos a reuni manera un famia grandi, manera mester ta den carnaval y manera tabata antes," Arends a comenta.

Den e reunion cu e gruponan tabatin, a scoge pa e tema di Cactus Fantasy, cu a worde uza caba tempo cu nan tabatin 5 aña participando den paradanan di carnaval y a gana tur e premionan. Señora Martica Arends ta splica cu tur esnan cu ta interesa pa participa cu nan, por inscribi ainda. Aunke cu e grupo tin number di Savaneta, persona di henter Aruba por participa den e grupo.

E gruponan ta bay uni manera un seccion di "comeback" y cada un di e gruponan menciona lo por acomoda 50 persona, pa e no bira demasiado grandi pa atende. E banda Excellence lo compania e gruponan aki.